

悅  
親  
樓  
詩  
集

悅親樓詩集卷七

起辛卯訖甲午六月

海寧祝德麟止堂

古今體詩七十六首

遣鼠

時已遷居接葉亭之北偏

寓齋別園亭竹樹一牆隔門廬旣湫隘庭宇亦偃仄老  
屋三五椽俯仰度晨夕餽匠半日工虛室頓生白塵埃  
絕絹素霜雪照几席黥哉彼碩鼠託此爲樂國聚族長  
子孫藏身尊窟宅于于蟻慕羶出出鬼矚隙猛虎欲逐  
逐幽蛩聲唧唧觸燈更翻盆穿墉或窺壁恃其爪牙利  
無處不剝蝕有時繫羣馬齧芻喧阜樞有時滴夜雨空  
階響淅瀝舉頭洞洞然玉屑紛狼籍依稀屋漏痕班駁

皿蟲跡主人靜者流守元甘岑寂日遭此物聒起坐意  
不憚竊脂尚可恕損畫理難借急當鷹鷂逐肯受鴟鵂  
嚇奮袖一竿投豎眉雙手拍將奔尾忽掉欲去目猶側  
迅蹶遽驚竄移時仍跳擲熏灌兩不能焦燥呼無力卷  
帙有蟬魚禾稼有蟲螻爾性同儀秦爾行同盜蹠素餐  
已可憎況等下吏墨安得淳于厭那學張湯磔長揖謝  
爾鼠於爾何怨慙余無肉食鄙但有耽吟癖其味主苦  
酸薰蒸寒氣積故紙充爾腸爾體亦癰瘡大河泉可飲  
太倉粟可食丹竈任憑依野田恣竄匿倘余迎貓來遄  
死不畱豁乾坤本自寬何苦太相逼

從慶雨林借觀袁簡齋前輩所書詩冊題後

才名曾識廿年前今日新詩見百篇結撰能空諸境界  
聰明直透到豪顛福兼清濁仙應妒助得江山句易傳  
一事源明差可恥如何半面竟無緣

### 煙筒

煙譜誰評品爲筒妙用兼取材同竹箭溥利類魚鹽每  
藉驅寒力能除逐臭嫌節伸蓬矢直頭曲竈囱黔短笛  
從教弄長竿亦任拈錫金隨意飾齒角踵華添製錦囊  
堪佩吹灰管並占南方謂之筒謂之入脣等銜勒合口  
想喁噲呼吸因風散蒙茸借火炎雲心出自嬾蘭氣吐  
猶潛文士抽思細貧家待客廉何如玉壺貯鼻觀味尤  
恬

眼鏡

障眼翻除障神光以鏡全細劖雲母薄巧琢水精鮮架  
準音質鉤梁曲循規疊璧圓分明犀理湛宛轉象緋緣似  
假虛靈地因彌缺陷天重離輝日月四日徹中邊翦水  
添瞳子看花便老年蠅頭書不隔牛磨曜堪憐借鑑同  
然炬摹形類運穿非鑲雙墜碇如襍兩繩牽飛衛寧蒙  
彼離婁反眊焉西洋傳妙製多謝綵囊纏綵囊明眼囊也見荆楚歲時記

題同年陳太暉朗抱琴入深竹圖二首

清風戛琅玕遞奏笙篴響誰抱綠綺來幽情與欣賞  
指間叔夜聲絃外柴桑意吾亦同調子竹林堪把臂

春闈分校作二首

丹筆僉名列雁行光輝六幕動文昌人如天策登瀛數

地是毘盧選佛場元老鈞裁風氣轉

諸城劉相國總憲觀補亭師經

師眇論見聞詳

閩學莊方耕先生邃於經學

當年手種元都樹多半

駢枝傍豫章

分校者半出劉觀二公門下

敢道量才玉尺持苦簾情味最能知銜將冤鳥前生石  
吐盡春蠶未死絲當日苦辛當日夢幾回風雨幾回思  
紅紗籠眼欺人語鄭重抽豪落紙時

五月望前一日五鼓趨直 圓明園車中作

駕言出西郊矯首 天門吼我僕捷於猱我車小於甕  
稀膏潤圓穿一鞭憑罄控犂确遵石徑轂擊聲如聞往

者曾衝炎有時更涉凍驕陽扇堀堞凝陰張去聲霧霽今  
茲蓐食行佳氣覺升降地有花木勝候比春秋仲雨餘  
轍迹柔露下波光動明月銜半山照出碧宇空依依柳  
影迎郁郁荷香送好風東南來眾木高低弄出郭已清  
曠緩轡戒飛鞚逶迤度虹橋恍入鈞天夢平生愜幽賞  
況乃辭倥偬閑官忙亦閑賦情寄景宋

西苑觀荷

西山闢天府包絡蓬壺徑是爲

帝王居而愜水雲勝有木皆瓊華有泉皆玉瑩雙湖面  
宮牆稱名宜曰聖灼灼芙蕖花得氣超然翼青錢疊春  
暮朱華冒夏孟九霄露初分萬年枝相並日邊曙氣馨

雲外波光靚 鑾輿數往來似亦奉朝請緬彼滄江上  
嬋娟倚曉鏡畫橈采無人葑蓼徒紛映路塵詎能浣所  
憑豈不淨近天雨露多得地風姿併託根一已殊顏色  
疑徑庭液池不增榮淤澤不改性人自費平章花本無  
心競

萬花樓歌

嚴嵩故宅嵩本居長安街此其別業  
在半截衛衛卽今聽雨樓之後樓也

長安街西相府拓外城一面增式廓此樓傳自嚴分宜  
纔畢城工便荒度當時甲第跨數坊引流堰水瀦爲塘  
雕甍繡闥規中禁佳木珍禽索異方太師西內元修結  
固寵營私威福竊液池應召龍舫移直舍重新殿材撤  
此樓笑兀何人居尙寶驕兒臬烏雛蔡攸叛親曷足數



王雱導父猶爲疎天資敏達兼陰鷲喜怒善窺人主意  
綸閣能通御札庾醮壇代擬青詞媚百司白事請鈞裁  
往質東樓天下才平明抱案聯班候薄暮忍飢未遣回  
萼山先生意氣豪司閭頤指環兒曹小雞上壽竇聞入  
假犬陪遊籬外嗥樓中清玩知何物彝鼎圖書遍羅列  
玉帶奚嫌古冢搜珠冠但博妖姬悅狎客淫朋向火忙  
酣歌恆舞樂洋洋斲牕幾累老奴死投轄寧知慈母喪  
剗鋤異己忠良如慾壑難填姦黨布大小丞相攬朝綱  
文武管家攔要路十年冰雪鈐山夢不記歐陽一語諷  
氣燄薰天勢絕倫官家忍把廉來縱自謂兒孫百世基  
一朝拉雜冰山摧國門難騎款段出墓舍還求飣粥來

歸然此屋餘丹雘簿錄當年歸鎖鑰偃月誰窺李氏堂  
格天猶指秦家閣有木皆作醜枝樛有水盡是貪泉流  
孤精終歲長爲窟燕子逢春亦恥投

東方未明硯歌爲沈南雷儀部

世燁

作

背陰銘云殘月

暉暉太白睽睽鷄三號更五點此時拜疏擊大  
奄事成策女功不則隨女貶款署南星二字

鸛眼青青鵠眼碧徑圍二寸紫肝色硯池鏤作斜月形  
銘語昌黎詩句借問誰製出太璞珍云是前明趙夢白  
先生立朝風采峻廿載迴翔終鍛翻泰昌再起登崇班  
煬竈宮闈逢魏客逆奄初亦欲通贊中書介紹麾之亟  
宏政門前並坐時一言直可褫姦魄未幾凶餒益烈熾  
養虎患且生肘腋楊左諸賢奮袂起二十四罪交章劾

公疏雖未出袖中此硯已同段笏擊從來眾正弗勝邪  
崔魏鼠狐安足責先生被斥善類空屍骨園扉旋狼籍  
點將錄已快報復頌璫祠乃遍充塞同光共影須臾期  
信邸龍飛元惡殛是時詔旨方召還惜未稍延逐臣息  
滄桑陵谷百卅年尙得流傳一片石東林講學供研摩  
雲代戎邊伴遷謫結鄰友隨李衛公玉帶生攜文信國  
介如足配勁節貞確乎不改忠肝赤陳來几案襲綈錦  
東方未明光暗射望郎得此自貽厥重之不減連城壁  
清時無所用鷹鷂作賦但磨香麝墨

題龍洲道人集

我讀龍洲詩緬想龍洲人跌宕狂吟學李白沈酣縱飲

同陳遵隨車娘子化琴鬼一第落拓安足云慨自思陵  
主和議事讐忍恥甘稱臣虎將橫實賊相手忠良解體  
朝綱棼隆興內禪銳恢復督師張浚戎機俱符離又踵  
富平敗從此國勢彌羸辱過也蒿目皆裂血兩河百郡  
胸中蟠移書當局論方略何嘗一日忘中原漆室女爲  
倚柱嘯杞國人以憂天顰光宗不繼孝宗孝迴波栲栳  
歌重翻過宮一疏叩魏闕侃侃亦見正氣伸元龍渤海  
恣豪放嗣宗禮法難拘牽益公焉得致此客越帥枉自  
資千緡卽以詩論亦雄健后山爲弟涪翁昆何人奪自  
蘇叔黨廬山面目還其真世所傳小坡斜川集卽過  
詩也特以名同而譌耳抱  
遺老人墓表覈東齋可有祠堂存幾時再拜奠桂醕作

詩一弔崑山墳

驟雨

雲裏魚鱗落室中龍氣腥垂空碎江海撼壁走雷霆頓  
遣塵埃洗忙教戶牖扃忽然收猛勢露出半天青

雨霽晴軒過

秋來暑未去一雨獨蕭然木葉滴濃翠瓦溝騰溼烟生  
衣多蘊藉熟客少周旋卽事容疎放長吟博和篇

寄簡田兄汾州二首

躑躅彼汾湄誰能借馬騎尋碑好妨廟題句崛嶮祠鉛  
槩通風俗羈棲感歲時平生負米意歧路幾人知

去歲王胡驛相逢話苦辛豈期向隅泣難慰倚閭人我

媿妨賢路兄非久賤貧新鸞看出谷來疇上林春今歲  
兄以余分校  
循例迴避

三十初度

花甲平分得半光未來冉冉日方長朝班十載叨紳紱  
史局三通職縹緗承修續三通功德言從何處立畫詩書且  
一身藏聲名合在華齡著慙愧稱觥弟子行

慈寧萬壽頌十章

謹序

臣聞雒鈴甄況斂敷敘皇極之疇岱篋儲齡駢行  
載泰元之策況復繹天經於孔命聖就通靈括地  
象於羲父安貞履吉星軒叶度偕旗翼以長輝日  
夢呈祥運斗樞而久照然而辰推軒筴弗詳附寶

之春秋侯展堯奠靡記慶都之歲月或流虹華渚  
而升恆之介祉無聞卽降臯高禩而曼羨之休徵  
莫述固詩書之有閒亦美備之未臻若乃寶瑞豐  
融康齡桑襲犧年昊歲皇人登綺甲之期山鏡海  
籌暢月啟昌辰之喜畱俞潤大鉤鈐朗列三垣建  
福騰歡崇壘頻呼萬歲譯狼歌於樂府王會圖增  
啟鱸篆於神都帝臺文綯此尤台雛循蜚以降特  
揚昌熾之隆嫺嫺宛委所藏罕邁龐洪之盛者也  
欽惟

聖母崇慶慈宣康惠敦和裕壽純熙恭懿安祺  
皇太后陛下道協坤維德符乾覆瑤筐珠蕙誕

神聖之奇祥紫闕金根秩

尊親之鉅典視膳備九州之養孝奏天儀含飴享五葉  
之蕃芳騰日幹我

皇帝陛下瑞席蘿圖神凝松牖八寶會極青祇錫嘏以  
壬林七政循規蒼緯降康而旭卉三紀洽歌風之  
化熙象皇將六旬眷愛日之輝篤誠孺慕爲天地  
母浸溥博而長生惟億萬年奉

慈寧而出治是以珠聯璧合元符旣襲兆於前山峙川  
增洪算亦延期於後屬茲重光之歲欣逢

八表之祥卯紀年支五際正當天保子標月建一陽爰  
俶周正晷躔已屆履長光引瑤窗之綫日數方符



積矩氣調緹室之灰登六合於華胥躋羣黎於壽域

帝齡永錫彌懷歸善之誠

壺福方新載舉祝釐之典卜云祥習扶玉軼以東輶  
律轉青陽耀葆幢而春省榆膠升煬配藜光應乎  
樵蒸瑣壁承巒肸蠭精孚於石礪廼美庾縣之禮  
大旅蒙嘉不煩亭奕之封天門降祉旣迴翟路  
遂詣緇林樂奏鼓鐘堂聆絲竹商彝夏鼎特盼典  
寶之藏壽檜神楷竝發太平之瑞此則懋寧親之  
孝統繹尼山賡難老之詩事高魯泮者矣而後荅  
三靈之嘉貺牟壽斯康合萬國之歡心慈祥務廣

秀髦上第賦作人壽考之章台耆頭銜獻多幸老  
民之序疊寬令甲千邨告黷孰之饒普復租丁百  
室被桐生之豫筮有孚於盈缶喜看海寓之熙春  
諧從欲於薰絃恭詣 山莊而清夏普陀建刹聿  
新西竺之精廬鹿砦行圍用薦南陔之珍膳輦庚  
辰之鎖狼烽永靖於龍庭款戊己之屯烏譯遙通  
於虎落則有扈特遐陬玉奇舊種冒彫萬帳輸誠  
共越乎蹕林懸度千層襴屬遠逾乎磧鹵往者西  
戎卽敘早傳頡利就俘今茲北部全歸迭見呼韓  
入侍蓋荒服景仁有素故鱗集以仰流而  
聖人讓德爲懷謂象來之致福率壤則偕遊鵜鰈爰設

文閣裨瀛則竝育黼黻欣依樂土於是采飾頗黎  
之輦晴迴郅偁之旂揚聖節於娥臺秩上儀於姒  
幄華鯨曉振闔闔齊開葩瑤晨張句陳肅衛

皇帝乃親率臣工敬齋

璽冊琢昭華之素版寶紐龍盤轡延喜之丹文宸章  
鳳翥芝函璀璨郁五色之祥烟萊綵葳蕤炫九華  
之福殿仰

懿顏之愉懌色笑皆春崇

顯號之堂皇禮文咸備蘭殺芬飴奉甘旨以親將蟒  
式盤旋應矩規而躬舞孫曾繞砌華屏聯錦  
字之光耄耄盈廷盛會廣香山之數啟法筵於鹿

苑萬佛樓成引清梵於蜂臺七香輪現魚龍百戲  
總會仙倡千羽兩階竝輪琛寶鑿紅生翠隨朝集  
以來庭茲白乘黃旅要荒之底貢由是華天揚而  
葛天閔九變依韋介雅秩而需雅敞四廂從律瑩  
醴咸始盡敎鰾鼓夔歌儻昧兜離共隸象胥龜部  
大酺頒賚疑屈羽玲曲宴聯驪同歌宵雅仙人六  
膳蓬厨分神鼎之煙玉女三漿菊井注儺州之雪  
紫泥函 誥羣欣捧檄彈冠赤水恢羅不棄類珠  
考玉百爾則丹心效職茂膺階級之增諸生而皓  
首窮經榮等孝廉之舉金鷄展翼貫索躋空木鳳  
銜書閭閻慶洽則見環來王母船泛真人平露華

繁延嘉葉茂殊翁節足偕羽鶴以交翔周印純靈  
共般麟而竝擾步景伺吉雲之秣儲駕白瑜聲風  
浥甘露之腴同榮紫脫紀庚辛之重慶綠袞頻書  
編甲子於萬年珠囊久繫信敷天之景祚而壽世  
之貞符已臣蘭臺珥管叨陪侍從之班

萱凡臚歡預被 恩綸之錫傾葵忱於日下鳧藻同聲  
效芹獻於

坤成鴻禧是介敬成十頌竊擬九如用紀添籌付諸擊  
壤詞曰

聖母配

天天祿寵受瑞表電樞祥開石紐有德克昌履仁乃壽

泰媼延長柔祇單厚

其一

德符冒茹福應悉新節當長至

袞進八旬葭莩應律黍谷迎春懽洽中外燕及神入

其二

穆穆我

皇運衡執矩恩逮天民孝孚聖緒庶彙斯和五辰式序  
祇養

璇闌怡顏

展宇

其三

發歲展事中春考祥精禋畝貺

懿輦迪康迓釐格岱屬御省方致敬誠若申錫溥將

其四

逝矣氏羌率其徒旅暨印仁風麋處沃土歸順誠殷

優恤既普遊于福林躋于壽宇

其五

帝覃

慈惠眾幸濡膏復租藏富籲俊烝髦赭衣以宥黃髮庸

褒肖翹咸被鞠泳斯陶

其六

慶節既臨榮光有煜芾芻皇皇旌旂郁郁爰詣

壽安載申晉祝純嘏駿龐宸儀祇穆

其七

璠章被篆

徽牒鏤璆瓊酥泛葦芝蓋承輶南蘭東壁雲歌星稠昭

天之命百祿是遒

其八

大禮攸行嘉祥宏被錫類推仁凝禧綏祉榮及箕裘

愛敷麗穉上暢九域旁震

平聲

八鄙

其九

負乎尚已俟其禕而德音彌劭洪祚孔熙頌曰燕喜

雅曰罄宜以引以翼

萬壽安祺

其十

壬辰元日朝退試筆爲人題畫

朝回風日正晴和  
弄筆幽窗樂意多  
那識村橋明月下  
梅花香影在漁蓑

題椒園沈丈晚芝圖

耕煙種瑤草  
縹緲多仙眞  
入室丐殘馥  
馨香思善人公  
具霖雨姿  
早歲繙荃蓀  
名膺制科選  
位躋司憲尊  
方佐刑措理  
詔許懸朱輪  
遺榮昔廣受  
杜德今荀陳  
眞州大江表  
多士秀而文  
爲

君溥教化非徒耽隱淪  
不其書帶草關西鱸魚鱗  
盛嫩



之所感往往休祥臻數間絃誦地善氣周氤氲晨興視  
階砌有物產輪囷分房裛甘露結蓋承景雲黃玉擢莖  
奚顏霞舒葉紋春生杖履古秀襲竹素新誰令齋房瑞  
而爲講舍珍長洲彭氏宅

翰文尚書

苗者云無根瑞應世篤

慶於身及子孫近來淮海家

潤泉學士有前後瑞芝圖

亦貌瓊華神

科第夸海內聯翩紀庚辛惟公懋碩德如芝毓精醇孫  
枝正駢列接武揚清芬更聞茹玉脂延年比松椿赤木  
安足道黃精亦非倫公本舊供奉扶鳩趨紫宸鈞天  
重入耳法酒纔霑唇壽域覃洪禧佇閱八九春公入  
香山會題辭我再申

丈於去冬視京今禮成將歸矣

上巳日簡田兄以素冊屬書鳴謙驛詩復題一

律於後

孰遣聯床聽雨人晉陽旅館忽相親  
白詹本是宗支秀青眼尤於客路新  
剩有詩題榆次驛卻教書仿永和春  
天涯兄弟重完聚會看龍門有縱鱗

時振弟公車來京亦依郵寓

分校禮闈所得士金

榜

廷試第一詩以志喜

金榜名題金榜首芬芳姓氏合稱奇  
萼村人道難爲弟令兄蒔亭由翰林改御史衣鉢君真得  
自誰在昔已無溫飽志從今

更樹鼎台基東南竹箭森茗秀紛映瓊林桂一枝

是科江南

館選六人余門下居其四無錫鄒炳泰丹徒茅元銘荆溪潘曾起及君也

同年王少林

嵩高

謁選來京以桃葉歸舟圖屬

題八首

少林書最拙而姬工楷法能評酒善結網詩中並及之

不裝書畫載神仙桃葉春深渡口船山學蛾眉波學眼  
分明相映射湖邊

雙槳迎風打暮潮紅綃卷處太招搖月明如水簫聲咽  
載過揚州廿四橋

委地烏雲未試梳打開光照玉肌膚不愁拔刃恩恩至  
我見猶憐況老奴

少林有一把烏雲紫皓腕盡妍  
人欹枕看梳頭之句故嘲之

香匳茶臼接書床新釀蘭陵琥珀光清聖濁賢憑選取  
先開泥甕替郎嘗

評郎家帖把郎嘲玉版臨摹著意教吟就溫柔韓偓句  
簪花宮體不辭鈔

烏衣故事盡風流一代才名上爾頭試問千絲今網得

幾時能辦五湖舟

飛鳥無端墮朔雲  
網來雙鯉訊徒勤  
河陽莫更栽他樹  
紅豆花前要詛君

盡子忍切他狂詠耐他癡  
我也情多畧自持  
不作分司輕薄語  
他年生怕阿侯知

題朱予培

培之

折柳送行圖二首  
予培與余同

舉茂才累躋場屋  
辛卯春發憤北上  
應京兆試  
同人繪圖賦詩以贈  
其行是秋果捷經魁  
今春榜報罷歸里  
題詩送別并慰其蹉跎也

河橋官柳故依依  
人送君來我送歸  
暫息鯉圖休佗傑  
況經鸚薦有光輝  
五湖三畝棲遲穩  
客燕賓鴻去嚮違

惆悵相逢飛絮候攀條今又綠陰肥

卯角共登童子科研求聲律比羊何旗亭競唱黃河曲

下里誰賡白雪歌跋扈飛揚文最健嶮崎歷落氣難磨

揚雄嘗吃工詞賦珍重儒冠髮未皤

君口吃工詩

雨邨至自蜀辱投詩次韻奉荅二首

且欲追尋千古事最難料理百年身文章自帶煙霞氣

軒冕非爲桎梏人菊徑讓他陶令傲琴臺愛共馬卿貧

蘆簾紙閣三間屋贏得深藏故國春

時攜寵姬至京

工部堂前共把卮未終絃管遽分離

余使蜀日君每吟譙我於草堂

渭北春天句

指集中見懷諸作

難忘巴西夜雨時同輩才華君

較健翰林官職我甘遲濟川好在開帆卜莫待中流試

險夷

來詩云如今宦海爲家客  
不向風波問險夷故折之

送方潭宰博羅六十韻

中年多哀樂同調難別離聚散十餘載苦辛歷歷知憶  
昔羈旅日邂逅親光儀我齡未二十君亦壯盛時飛揚  
文酒會縱興何淋漓但覺天宇曠不知世路巖龍門旣  
黥頰各返西湖涯謀生爾足繭寄食我顏低越歲值科  
詔同赴公車期餞臘黃河曲迎春青帝祠雪花趙北際  
柳眼燕南垂客途所閱歷一一猶記之到都寓蕭寺孤  
燈雙影隨風檐有利鈍文字無妍媸董方慣下第李邵  
空伸睂遂令同巢鳥羽翮又參差賤子滯春明治經日  
下帷亭前嘉木蔭茂悅紛離披回念故園景長懷風雨

思君乃襜被至叩門面目鰲煖湯洗汝塵開箱更汝衣  
已下孺子榻更傾文舉卮同居忘形友實維西川雷掇  
奇隸故實鬪韻拈詩脾宵深或倚笛晝永常敲棋雄談  
雜諧語行坐無乖違豈知歡樂境悲哀伏於茲雷峯奔  
楚北余亦涕漣漣

丙戌之秋余與雷峯先後聞大母訃

時君適捧檄欲赴

皖江湄方謂追風足千里展所施柰何鬼蜮技忽壞循  
良規桐城三月宰奪職踉蹌歸到家聞哭聲北堂兼喪  
慈敬通土塞門臯魚血滿衰未能扶服救惻惻傷中懷  
騏驎卓天骨世皆相以皮元珠求赤水天網獨恢恢起  
廢拔其尤仍令墨綬垂枯楊更生華涸鮒方在池逝將  
南海去苦向親懿辭君今叨異數不比凡有司博羅矧

劇邑舉措先所宜恤民究利弊潔己酬恩私人運判  
通塞天道嬪盈虧欲識委順理但將今昔推我聞惠州  
境坡老流芳微有水似家湖惠州亦西湖綠波春渺瀾羅浮  
大洞天一半分蓬萊四百卅翠峯雲族之所棲七十二  
丹房眞人之所遺仙佛各有跡今古俱有題蝶衣炫繪  
繡松鬣交葳蕤公餘逞眺覽亦足開心脾花顏照酒幔  
風色颺鞭絲親朋集祖送執手當路歧獨有懷歸客轡  
銜尙自羈廬非嚴助厭粟苦東方飢送遠感生平要言  
亮莫欺惠而能好我但誦贈行詩我詩婉且質肺腑無  
諛詞

寄夢樓四首



門外江風打暮潮坡公詩不負金焦

用游金山寺落句意

文章自

在同朝口十萬寧纏拙宦腰豪氣元龍尙湖海清聲鷄

鳳漸雲霄

間試郎已露頭角

頭銜豈直龜蒙拜知有仙人抗手

招

問字談經道不孤共傳祭酒住西湖

時掌教崇文書院

後堂誰

許聽絲竹絳帳端宜列鄭盧結習未除憑佛懺此身難

了是詩逋江山憎爾雕鏤盡畱待歸人管領無

十載重尋鷗鷺盟丁香依舊事都更

君官翰林日所居名丁香館

過

江衡鑑材無失

竹虛視學江西

分陝旬宣政有聲

秋帆布一鶴政關陝

已歸千佛嶺

雷峯還蜀家在千佛山

八騶又去五羊城

李隨軒觀察高廉

可憐半臂何人送椽燭修書宋子京

小巖罷職修書館行走

投閑置散分眞宜莫怪侏儒笑朔飢米貴長安居不易  
官多上界轉應遲鱸膾此日思遐尙雞黍何年愜素期  
句曲茅盈預仙籍教傳心事報君知茅庶常爲君同里人時乞假歸省

題鄒念橋侍講竹溪新霽圖

虎觀追蹤幾十載蠡房接席又三春

今春同校禮闈瀾翻羣服

談天客映麗誰如照鏡人忽憶梁溪泉水好恍攜謝墅  
管絃新君無錫人精於音律竹邊少箇煎茶伴添我科頭野服身

偕雨邨遊法源寺遂訪吳鑑南

璜

於翰墨堂畱

飲棗根簪酒出示新詩因借觀商寶意太守質  
園集太守鑑南舅氏也

攜手過蕭寺環門柿葉紅僧歸松徑北客住佛垣東酒

可賈餘勇詩應拜下風舅甥原不別憑賞色絲工

靜夜思

寒月入牖滿洞房皎如白雪濃如霜燈缸倚壁慘不明  
微風拂拂開流黃披衣起坐心徬徨月光徘徊攬不得  
良人正戍狼河北

昔有二首

昔有女媧氏人首而蛇身一日七十變其腸化爲神文  
章有化境微妙非言詮奈何拘繩尺守此語錄篇

昔有能仁佛澄觀觀自在三千世界塵八百功德海文  
章有定力遊心契眞宰奈何聽瑩徒妄逐流俗改

送林孝廉

喬蔭

歸侯官

令弟謝蕃官編修爲余  
辛卯所錄士

地用莫如馬廐塊騁汗血龍媒產渥洼匹匹權奇骨服  
用莫如珠垂旒耀卷驚夜光出合浦顆顆晶瑩質侯官  
林氏子兄弟皆超越唐成兩肅霜漢女雙明月髫齡痛  
失怙世德幾衰歇恭惟太夫人義方教無闕宣文口授  
經陶母首截髮黽勉成二子秋榜連名揭同車上春官  
仲也先穎脫阿兄苦踏蹬獻璞三遭刖翰林官職貴時  
有不黔突何況席帽人賣文安得活緒風催歲晏不寐  
懷明發晨興叩我門逝將膏去聲歸轄無力爲吹噓一言  
聊贈別安心絜蘭膳努力理芸帙勿言閭室投勿悵霜  
蹄蹶珠光不可埋駿足終當逸我聞積善家從來興也  
勃

紀事

乾隆癸巳二月吉 詔開館局編叢帙太史河明津逮

長文昌宿朗光輝溢洋洋

聖謨方廣運稽古文思作兼述在廷元老盡監修合院  
詞臣咸載筆旁求宿學逮省署辟召遺材到巖穴鈔胥  
萬指課功勤程限十年歲事必初從翰苑發所藏永樂  
殘編多割裂排比如縫狐腋裘爬梳似揀金沙屑未幾  
疆吏競應 詔各獻珍奇萬種出牙籤鈿軸滿槐廳列  
几分曹司校閱經經緯史芳潤漱諸子百家精妙擷有  
關世教近亦登無益人心古必黜權衡筆削稟 睿裁  
雕刻鈔存定甲乙 御題時或庸作歌論斷森嚴齊服

悅緬維羸秦揚燎餘漢代右文求竹漆石渠金匱紬祕  
簡藜閣蘭臺置清秩魏晉而還稍衰替帷囊冢壁因殘  
缺唐之四部宋三館庶幾齊條目列 國家承平百  
廿載文治光昭古冀匹天驕琳薌美富儲猶復殷勤搜  
放失寰中士夫好汲古善本補架雲霞蔚輦輸恐後非  
博官爲感吾

君精意密好寫奚須子弟拘畱眞翻笑河間譎定知荀  
勗及張華恨不生來逢此日鯁生遭際竊自幸獲附羣  
賢操簡畢如遊寶山入武庫眼光晃耀口流沫昔年論  
衡作祕牘十七史從何處說祇今一目十行下難向鄉  
嫗窺萬一辰趨西遡恪襄事或冀姓名挂卷末還從府

史細咨詢恐有陽城充吏卒

翰林院土地神送迎曲

并引

翰林院衙署北嚮入儀門爲登瀛門由甬道折而東爲土地祠祠有像設袍笏端坐立木主一題曰唐昌黎伯韓公之位不知其所自始每大學士掌院學士及學士以下各官到任恭謁至聖廟畢必瞻禮焉癸未二月滿洲阿肅洗馬方辦院事夜夢入署見祠外儀從赫奕鼓樂迭奏召館人詢之云新土地上官問神爲誰則侍讀吳公鴻也旣入清祕堂遣僉從稱賀神亦答刺如平時覺而異之及曉赴院甫下車則吳公家人具狀以病故白乃恍

然夢之非妄也夫土地位卑而職冗各直省貢院  
及翰詹兩衙門俱奉還之或緣起衰鉅手爲文責  
司命所歸然以公日星河嶽之氣似不當屈以末  
寮若吳公者庶幾樂公社酒或相稱焉其遷替之  
故則不可得而知矣吳公字頡雲號雲巖仁和人  
辛未殿撰卒之日年未四十余幼讀其文而慕之  
是春公車北上公方由廣東學政還京師以鄉後  
進修士相見禮距公卒不半月耳五月初三日爲  
祀神之辰乃作送迎曲以安神云

傷天闕兮華堂惟司命兮文昌儼冠佩兮偃蹇靈之來  
兮迴翔鏗朗鐘兮考鼓折申某與杜衡薦嘉兮達臭猷



笙詩兮舞倡列四庫兮五車環圓嶠兮方壺芬芳兮周  
流懷故蹤兮懽愉古槐幽繆兮蔭宇駐靈旗兮紛在下  
戶音顧人命兮何常聊相羊以容與

右迎神

神具醉止兮降福孔嘉回風飄忽兮德音其遐覽四海  
兮無極思夫君兮奈何杭州兮惠州西湖之水兮雙流  
雲車兮安適願弭節兮夷猶文壇兮藝圃翼翼兮衙音  
衙傳蘭茝以結言永陟降兮終古

右送神

休沐在告獨坐蕙香中誦小謝詩翛然忘暑因  
贈友人

梧桐棲鳳條所媿託微禽休憩暫從告納涼開素襟蒼  
苔上階基喬木俯庭陰展帙諷清詩穆如風入琴灼灼  
蘭蕙花馥馥含浮沈揚芬襲竹素適性觀古今庶言闕  
倚侶閒寂同山林常見芳菲歇預愁秋氣侵擿茗弄瑤  
華將以遺所欽路阻莫能致何由慰我心

落葉四首

纔報銀床一葉桐銷魂坐聽萬山空劫歸楚澤波光裏  
聲在吳江句子中永巷有情哀怨獨長亭無語別離同  
狂飈不管春皇事埽地翻飛逐轉蓬

已辭欲脫又依依回首亭臯景盡非驛路暗隨千騎走  
寺門閑引一僧歸相將酒旆颺邨店還共蘆花捲釣磯

若向枝頭溫短夢小園記得綠陰肥

高樓寂寞鎖相望怨女辭家客去鄉千疊雲巒太明白  
滿城風雨正昏黃敲殘鞦韆夢縈冰簟觸起詩情繞石床  
未必歸人消息近滿林依約卸帆檣

底用淮南問苑枯蕭蕭撼撼遍平蕪蟲吟階下亂砧急  
雁度樓頭橫篴孤莫漫酸歌羣島瘦試教秃筆寫倪迂  
道旁看取青松樹知有行人託芭無

三哀詩

并引

延之五詠杜老八哀名位不同交契亦異二劉公  
爲麟館師文達亦翰林前輩追隨朝署親炙有年  
自夏徂冬相繼淪謝作三哀詩用志感愴以卒之

先後爲詮次其政事文學具之 國史詩勿詳焉

太子太保尙書新建裴文達公

青蓮謫仙人鬢眉皆秀美聰明徹毫末清潔蛻塵滓當  
事似閑疎縝密乃無比節目勿細苛務在得大體好賢  
如不及聞善輒心喜司闡但虛設排闥納才技殷殷汲  
汲懷人弗汎濫訾浩浩落落風人弗貴倨詆迂生夙疎  
慢廉門罕投趾近因書局開公來綜條理大庭接言笑  
心醉飲醇醴如挹千頃波四顧失涯涘迴思改夏初力  
疾猶莅止柰何寶善亭

校書之所

忽斷尙書履河渠昔底績

竹帛成勞紀廟食燕子磯臣心終似水

彌留時自言當爲燕子磯水神

太子太保大學士武進劉文定公

楊綰登政府黎幹減騎從鄭公接百寮鉤禮勞迎送學  
業蔚醇儒謀猷資國棟小心踐樞要大度畜庸眾章服  
必致美家無粟盈甕四十便閉關久絕房幃夢謂當頤  
養和奚遽實霜露緬懷 廷對初繆膺砥砭貢芸館教  
育日砂礫叨磨礪府中無雜賓談論多折衷從今西州  
門永抱羊曇痛

太子太保大學士諸城劉文正公

靖共好正直駿厲絕偏黨房謀兼杜斷 渥眷近無兩  
下寮畏風采山東老木強豈知名相度初不關氣象樗  
材黠翰苑公實木天掌論事曾忤公未幾邀激賞冒慙  
遐自慙益服襟懷廣同曹草內制字字明珠朗轉令畫

樣手斟酌乃奏上豈非知己感此意勝宏獎十年無私  
謁白事偶一往自從館局開昕夕接音響奄忽竟騎箕  
臨哭移 天仗恩禮備哀榮泰山今曷仰

新修瀛洲池成引劉井水由地道灌之出龍口  
淙淙然池中荇藻交橫游鱗可數池上老柳垂  
絲百尺掩映多姿徒倚軒牕欣賞不足率爾成

詠三首

海山瀕洞杳難尋如聽泉流幽澗音不必成連來就我  
援琴自奏水龍吟

子非知我我知魚莊惠濠梁興有餘比似文瀾游泳者  
依蒲在藻樂何如

千條萬縷碧絲長自賞風流淥水旁多少玉河堤上柳  
高低只隔一重牆

承 皇六子質郡王敎題畫禪集腋卷子

畫工落筆循徑塗畫禪忘象通權輿其間能事孰可誣  
得意總在結構初方今 明詔開石渠抱一藝者咸鳬  
趨河間大雅傾碩儒鑒別不遺四庫儲旁收六法供清  
娛荆關顧陸邊黃徐班門獻技舐鼠鬣寫生寫意眾妙  
臚花鳥泉石十二圖譬如集腋裘成狐碧空雲淨秋氣  
疎眼前景物淡不枯一嶺瀟灑大筆濡天機所到神逸  
俱無多筆墨超形樞驚捧讚歎盈簪裾是爲上乘宗派  
無鸞笙一奏齊竿逋眾史斂手慙才麤諦視幅幅真小

正品第奚翅龍與豬始知采納由心虛天人游藝道之餘淵源

聖學尋歸墟繪事後素詩禮腴製作悉把凡言祛卽畫論畫猶方隅玉堂早晚親履絢敢從覺海求如如

清明後一日登陶然亭晚眺

吾家御史園難問工部陶人厰尙存

國初諸前輩往往契集祝氏園黑

窑厰按西河詩話祝氏園在安定門西關左祝御史別業也今不可考矣黑窑厰與亭鄰近獨上江亭憑檻望淡煙疎雨欲黃昏

初夏偶述次簡田兄寄懷韻

飛來燕子近幽龕細語如同客對談人海藏身聊問影書田耕九未餘三畱連豈敢承明厭俯仰惟懷堂構慙



自覺條冰猶可惜  
陋居初不羨潭潭  
時以察典記名外用憲院長奏留

無題二首

中庭記折小櫻桃  
短札長箋贈答勞  
美意難酬青玉案  
好風初翦碧絲絛  
黃鸝漂蕩春無主  
烏鵲徘徊月易高  
欲向秦樓問消息  
歲華金籥十分牢

銀河耿耿漏沈沈  
疑聽纖箒玉佩音  
載去壁車何限遠  
藏來金屋幾多深  
長垂蠟燭三更淚  
不放芭蕉一卷心  
莫以迷離憎夢境  
夢中啼笑倘堪尋

昆明湖

山以名泉著  
泉流水特長  
出山仍不濁  
掬水欲生香  
畫

鵲通橋穴金牛護石塘離宮頻望幸草樹有輝光

將之楚北贈同事陳觀樓編修

楚澤掄材地燕臺買骨心勉承明詔去幸伴使星臨  
宛轉同功繭聯翩比翼禽清詩能屬和莫惜短長吟

悅親樓詩集卷七終

門人錢璟校字

悅親樓詩集卷八

起丁酉五月至七月

海寧祝德麟止堂

古今體詩九十六首

奉 命典試閩中恭紀

三載江鄉依聖室半年日下預華簪散材辱被

主恩逮使節重教聞嶠臨最喜經過桑梓地翻憐枵腹

蓼莪心

甲午奉典試湖北之及赴程而先大夫訃音至

命未

歸途

詔許瞻先

壘一勺香醪雨露深

六月初八日出都二首

纔自南來復向南首塗練日發征驂祇承 朝命重持

節慚媿頭銜未改簪儕輩新鶯喬木集文章老馬熟程

諸莫嗤臨別依依態多恐親庭闕旨甘

路指歐閩一振珂迢迢南北限關河山川大有神仙在  
人物從來理學多行篋無書難考据使軺餘暇好吟哦  
卻因王事添游覽儒宦恩榮莫此過

是日又得一絕句

十七年來十度經依稀記得舊長亭紛紛人事多更換  
只有西山不改青

新城道中苦熱

昨日出國門山色照鬢眉今朝新城道暑氣蒸膚肌輿  
夫汗流漿舉手不停揮比肩良其背曳踵咸其腓息息  
作牛喘有力安所施苦索冽泉飲氣欲吞天池馳驅使

者分重累誠媿之我坐尙苦熱焉得責汝疲舍輿竟攬  
轡焦灼那復辭乃知天地大貴賤初無差王政重蔭暘  
課植在有司官柳表經界兼爲大芘資新昌固下邑錯  
壤接神畿輪蹄所輻湊是爲九達達十闕不一補何由  
陰紛披誰尋嘉樹傳當續甘棠詩

童梧岡劉載人兩侍讀典粵東試與余同日出  
都越一夕余宿新城而二君止於涿鹿恐以後  
不相及也詩以誌別

四人同日捧綸音一舍追隨遽判襟豈慮文章尙迷  
眼所期精白共盟心越王臺畔野花發揚子江頭秋水  
深去去前程各努力相思但託短長吟

趙北口口號五絕句

漫將遺蹟問公孫  
巨馬河邊破壘存  
如礪中央雲水合  
此閒風景抵桃源

沙頭渚尾繞菰蒲  
雨歇行宮儼畫圖  
十二紅橋烟柳外  
但令山好卽西湖

圓孟方罫割新畬  
處處浮簾種植初  
一部周官誤安石  
更誰去讀稻人書

土人積對爲田作方圓形以別經界與周禮注疏所引恰合

鷓鴣鷓鴣逐行飛  
沙柳汀蘆點綴微  
亦有帆檣衝水鳥  
釣船多帶夕陽歸

煙靄霏霏暑氣輕  
遊人眞在鏡中行  
若教種得蓮千頃  
應使風塵眼倍明

湖中多茭白茨菇而獨無荷芰

獻縣懷古

孔壁書未出漢廷詔頗殷維王勤好古大雅孰能羣傳  
可東平合名仍赤縣分余生文治世猶自誦遺芬

阜城縣有懷梧岡載人計明發當至德州乃聞  
粵分歧也畱詩驛館命候人致之

油旌雙引兩宗工候館畱連信未通臭味夙親鵠鷺序  
程途從判馬牛風行雲欲去還疑住流水將西不顧東  
我自搖鞭隨越鳥料他惆悵也應同

景州道中曉行卽事

夜辭簡子城曉卽廣川路太空養霽色夷塗絕窘步翫  
物機悉屏澄懷妙多赴高柳宿禽翻清谿新水注茅屋



幾人家隱映槐花樹羣動散村暝初陽炫葉露油油立  
禾黍澤澤眠瓜芋萬彙歸自然含生皆足慕田家荷鋤  
出喜色生盼顧但當足雞豚那復愁徭賦馬上殘夢斷  
卽目愜真趣欲募淳樸風媿乏儲王句

景州贈戈東長前輩戈偕余使閩景州其鄉里  
也

杖鄉年過穉逢秋獬豸聲威秉節遊畫錦榮宜宗黨仰  
前驅禮敢縣俟求丹霄車馬無端落素業詩書信可酬  
今日不容生妬羨景州南去有杭州

余亦得  
假省墓

謁董子祠

祠宇荒涼俎豆塵我來下馬薦蘩蘋賢良終古宗三策

鄒魯專家數一人賈傳有才同不遇江都可相且容身

石渠繁露重釐訂

永樂大典所載春秋繁露乃依宋板足本者四庫館臣據以訂訛補闕凡

改正千百字命付聚珍板印行

上太息崇臺蔓草新

問廣川臺無知者

德州旅館聞重劉二君兼程而來遂小憩以待

梧岡既至走筆立和余作仍用後一首韻誌別

分飛羽翮畫難工似有犀心脈脈通我守微生抱柱信

君行列子駕尻風詩篇投贈里慚下客館居停道累東

明日平原真箇別舉頭還喜月輪同

### 平原謁顏魯公祠

唐明皇帝苒武姿貞觀日月重光輝一從哥奴弄國政

赤心誤信黃虬兒堂堂顏公平原守察微知著幾先觀

募敢死士皆先登繕不浸城足禦寇日偕賓從事遊讌  
不使兇奴窺徑竇老成謀國智慮深豈待倉皇方補救  
俄聞胡鷄長嘯至潼關未陷東都棄平原慷慨獨霑襟  
中宵傳檄齊盟誓一丸蠟帛靈武來十歲孤兒范陽質  
偶因李粵假便宜先殺子光撲逆熾滅虜皆歸李郭勲  
山東實賴公牽制大河以北無忠臣天子不知何如人  
其所設施竟能爾一十七郡連齒脣當時睢陽甚窮蹙  
惜勿合勢援孤軍天旋地轉開雲日劒門寂寞迴龍蹕  
上皇出狩由色荒嗣主扶傾要良弼奈何接踵相元盧  
致使盈廷疎鯁骨蔡州西壁吾死所傷心竟遇李希烈  
太師名德在人間大人履虎寧憂咥常山之弟庶不愧

成公已往疇其匹瑯琊應有米招蒐厭次長畱不泯節  
召伯棠憑隔縣爭開元栢在行人詰一廛廟貌城之阿  
當階豐碣高峩峩我來再拜重摩挹細讀知爲信國歌  
二公正氣皆不磨嗚呼唐室再造宋社墟若論遭際公  
何如

禹城道中書所見

炎官火繖張圓穹行人畏暘貪清風連朝猛烈蹈湯似  
枝頭少女何由逢曉來雲纈魚鱗片著

直畧切

衣漸喜涼

颺扇忽然有物突如豕變作團團天上轉須臾萬竅盡  
怒號大塊噫氣翻神臯薛孤延稍鬪霹靂錢婆畱弩驅  
江湖勢張燄取物莫勝動者天折靜者撓蜩蟬茹氣不

敢出鳥雀斂翅無能翱我坐肩輿正疲茶盱眙呀呬那  
堪說惟見僵柳臥道旁火自空心燒斷節哺時天地轉  
清明樹猶餘怒鳴騷屑可知天下夷險途過去未來等  
一映

宿齊河驛館戲咏鼃蝨

蟲醜名狀蕃可憎莫如蝨蝨種亦頗多咄爾狀如鼃穹  
窿介突起糾緣去聲足環列其形類渾敦厥性更饕餮牆  
臉走虛空幃帳藏複密伺人夢寐間呼吸嚙其血爪之  
初點癢塊然漸成凸切近灾剝膚爬搔癢刺骨偵怠莫  
能禦呼羣復非一股膏伎最工遜跡意尤譎暗中苦摸  
索嚙境殊恍惚偶然快俘禽惡臭不覺噓曰余心棲棲

炎天道病暘朝苦蠅蟲攢午厭蜩蟬聒停驂聊假館勞  
者暫圖逸此輩乃僕緣居然恣咀齧膏騰頃刻閒我躬  
不遑閱骨立太瘦生何足救汝渴因嘆酷烈際人弗勝  
蟲蠶安得辱爪牙盡將醜類滅整冠起危坐卻笑前言  
失天道無不容君子亦恕物么膺固狡獪未足煩批抹  
呼僮登前途且與鼈蝨別

雨中望方山

在長清縣

自別梁門路塵沙眼未明遙知玉符色直壓祝阿城雨  
歇翠猶擁天低暝易生靈巖何處訪疑是夢中行

泰安道中烟暝四合望嶽不得見

翹首云亭咫尺間寸雲觸石徧孱顏天門日觀何從覓

漢柏秦松定可攀坡老喜逢東海市退之曾感祝融山  
神君笑我功名薄故把真形有意慳

禮嶽廟

森嚴碧殿倚蒼峯入廟虔瞻肅穆容秩視三公原配帝  
位尊四嶽獨稱宗金泥玉檢云亭禪死籍生籤號令從  
聖主如天包萬物不將功德紀登封

過泰安懷朱子穎

孝純

子穎故泰安守也

夙愛子穎詩未識子穎面去歲廣陵城邂逅一相見青  
山欣得主紅橋遂開宴共言神交久莫逆笑會忭是時  
天初冬淒緊風物變林莽渥赭酣菰蒲犀甲戰亭臺高  
下際十步九移換所惜興未極遽愁日將晏造化促陰

陽遊子畏冰霰雖然得勝遊那復畱餘戀度關期曉發

積雨密如線謝公重

去聲

開閭

謂蘊山太守

招我傾尊餞流連

歌吹中漏盡銅壺箭維君亦預坐懽會竟忘倦一堂二

三人蹤跡萍蓬判詩人例愛惜舊雨況繾綣臨歧各恨

恨遺我詩一卷爲君泰安集細讀月星爛船牕爲跋尾

回味果猶諫聚散本浮雲年光等瞥電唯有黃河心寶

刀割不斲別來俄六月粵余忝乘傳此邦君舊治風俗

咨諏善猛虎哭不聞甘棠蔭猶徧我冠禮神明殘碣訪

秦漢西隅古柏下有石立如岸道人指示我此乃朱公

贊余非楊德祖捫讀知黃絹斯人不可忘斯文孰能看

南風吹我思悠悠入淮甸大江流日夜鼓楫利風便假



道由邗溝遘止竇竊願使臣勵冰兢到處嚴報扞準待  
星軺還藥玉叨頻勸我從泰山來袖攜雲一片飛去或  
識君呼之問日觀

暴雨後山水陡發深不可度余策馬而泅者凡  
三處

日向山中詰屈行前途頃刻巨波橫直疑天上黃河落  
欲使人閒翠嶂平滅頂未嫻匏葉咏驚心頻叱的虛名  
吾叨乘傳猶如此何況雞棲旅客程

最後一處深沒馬頂土人夾馬而渡暝投楊柳  
店作

昨夜挑燈旅館坐取著筮之得大過爲言過涉滅頂凶

明日前途當坎坷山中犂确無淵溪積雨所匯高趨低  
三十里閒八九道其實一水支分醺建瓴屋脊勢猛下  
亂石翔舞如鳬鷺興丁聘貽望洋歎花驄瑟縮停霜蹄  
人言驟漲易消落安心等待休前卻無如天色近昏暝  
滿目淒涼雨又作跨鞍直入坎窞中所恃馬力能橫衝  
馬身欲上水欲下楚漢格鬪爭雌雄未幾尾鬣俱不見  
但聞喘息歎波面我亦沈沈沒半腰此時性命懸如線  
誰與偈偈稱健者無懼忽逢孟施舍左掎右角似七擒  
前挽後推只一把平時厲揭但負人今日負人兼負馬  
策勲應是掀淖多用命豈慮踰溝寡回頭岸上視狂瀾  
所幸不過五丈寬倘然浩瀚更增倍犂縱有力難牽援

傷寒雜錄卷八  
暴虎馮河終自悔燈前顧影驚我在酒酣一賦彭衙行  
故人高義無孫宰

余識徂徠山問新甫士人罕有知者馬上率吟  
一絕

徂徠新甫接龜蒙履核心偏到此窮安得博通桑郭輩  
與渠指點亂雲中

徂徠山下懷古

六逸高風孰繼之石田躬稼不求知釣竿爛漫珊瑚樹  
詩卷零星慶厯詞嶽雨暗飛空翠出溪烟長繞碧鮮滋  
千秋身後名何用到手深杯且莫辭

沂州夜發

慎役戒滯畱宵征愛澄爽驛鈴冥際辨斗柄空中仰眇  
默遵修陸依微接平莽羸驂十里行殘月三更上馬後  
數從來途前指孤往羽山尙青青沂河方泱泱水光湛  
虛華天容涵靜朗萬籟冲寂時何處著塵埃漸覺衣霧  
溼始見綺霞晃此時遊子懷曠然結遐想望母意鬱紆  
瞻 恩心震蕩爲語山中人未得辭羈鞅

座主德定圃先生以閩撫權漕帥余過淮陰方  
督運北上詩以奉懷卽用去歲畱別諸子韻

眾星詹北斗魁柄清霄揭羣羽僚鳳皇文章舉世悅先  
生佐虞廷有志追稷契出則爲雨露入則司喉舌門牆  
樹桃李汎愛無區別時迴陽春風吹噓到薄劣已庚十

載還僂指半離別恭承

聖主詔蘭秀甌江擷庶幾淮水陰藉釋私衷結青天轉  
萬艘歧路違雙轍公握天下砥頰展諸侯節昨歲發旌  
旗東都供帳設奔走南國賢攀附北門傑適余滯田廬  
未得陪行列還京讀鉅製思慕何由輟況復近台躔依  
光九竊竊此日虛望塵歸途期立雪一片明月心且與  
滄波說

濯亭養痾家園聞余過淮遣餉瓜果賦謝

君養季重痾我秉相如節淮水照柴門清暉接明月緬  
君虛白懷流曜同光潔而我悠悠思何時乃可掇柳依  
名園昔遊讌風景亮無闕室邇奈人遐山河方寸結媿乏

枚叔言霍然起沈疾循誦木瓜章重問維摩詰

淮南懷魚門銓部

闊步長髯論古初斯人風骨最蕭疎種成白璧偏艱子  
散盡黃金爲愛書老驥志空千里在元龍氣已十年除  
此間無起樓臺地誰可經營仲蔚廬

寶應舟中始聞蚊雷

天生醜類何紛紜北有鼃蝨南有蠚青天白日不敢出  
往往昏黑來侵人湖州豹腳最雄傑其次亦數淮水濱  
露筋祠廟照千古高風遠與夷齊親客行過此非信宿  
尺寸之膚皆所珍嗟爾胡爲竟血食以主暴客寧稱仁  
未暮先作嬰兒啼又如鬼車號愁雲吾惡聞之徑就枕

世系相傳 卷八  
碧紗幮底看波紋

鬢湖夜汎二首

帆前烟樹圓艣後練波碎高隄碧草肥屹若青山對太  
息文游臺斯人竟何在

非星非漁火水面來荒忽偶隨浪花生旋與漚影滅得

非老蚌遊銜珠弄明月

是夕所見如此

揚州託子穎寄家書

我逐浮雲邁山程接水郵燈前應算著今日到揚州

自紅橋泛舟至平山堂邀東長前輩同作同遊  
者爲同年姚姬傳時方主梅花書院

隋皇城頭鴉畢逋雷塘日落青模糊主人欲發客船到

平明邀泛城西湖，泛湖獨酌亦不惡。況復鷗鷺相招呼，

舊時清夢正須續。此而不到寧非愚？

是日子願蘊山皆以公事將出置酒

邀余獨遊遂拉東長同往而姬傳已先在焉

三人同遊皆不速，遂開錦纜衝

鼻宿空明。雙槳打琉璃，湖光如拭天如沐。到處山亭水

榭多，行來閣道迴廊複。人家三十六名園，只在紅橋一

團竹。就中江汪圍最奇，水晶宮殿蓬萊移。荷花遍滿香

世界，紅妝素面爭妍姿。清虛堂中略披坐，芳鮮已覺充

膚肌。探幽選勝興未極，移舟復向三賢祠。舟行岸移隨

境轉，蜀岡窈窕浮青巘。松柏千行作動搖，芙蓉一朵安

清淺。摘星樓閣試憑闌，何處遙峯餘婉孌。楚江依舊海

門深，古往今來指一撚。君不見歐公之堂已劫灰，蘇老



風流安在哉。冶春修禊盛。羣屐於今詩。骨埋蒿萊吾曹  
邂逅且痛飲。忍令兩鬢秋。霜催下山倚。嘯斯須立萬景  
蒼茫半收拾。偶然行樂不可過。穿花傍柳迴船急。長揖  
梅花嶺上翁。莫教驟雨沾衣溼。

梅花嶺瞻史閣部像

燕雀君臣自處堂。小朝廷不繫天。匹調停心力維強鎮。  
慷慨書辭報睿王。空有夷吾出江左。終教信國閱滄桑。  
重瞳異代加華袞。青史丹豪共表章。  
像有御題

遊金山寺

白銀盤裏一顆珠。何年遺落癡羊鬚。華嚴樓閣彈指現。  
望若海上三山圖。頻年鼓枻過山麓。未識雲板騁遊目。

忽隨白鷺翩然翔到寺東窗初射旭妙高臺前一憑睇  
有天有水都無地岷峩萬里瀉滔滔楚雨吳雲但一氣  
步虛不覺上塔顛塔影倒向江心眠我亦飄搖欲墮落  
慄然股戰難流連下山窈窕入禪房且試中冷一勺漿  
片時趺坐喘未定檻前已過千帆檣蓬萊左股無根蒂  
還恐漂流出戒外名山終賴達人傳重上僧堂訪玉帶  
大風自金山放船至焦山

德雲之堂趾已升焦先之廬檻未憑魚龍軒舞似迎客  
惡風駭浪何奔騰行險僥倖聖所戒臨深豈不知戰兢  
而吾徑命翦江去瑟縮恐惹山靈憎舟如擲鵲亂出沒  
飛廉奪路波生棱僮僕坐對色皆墨嘯傲興獨滄洲陵

七百年來事暗合操音真有同鄉僧

方丈擔雲和尚一爲余里人能詩

一

條曲磴導我上坡級歷歷高幾層可憐嶮峻無百丈居

然蜀棧同名稱

亦稱棧道

賈勇自恃腰腳健濟勝不用扶赤

藤露巢錯落竝野鶴霜翮捷獵隨秋鷹耳中砰砰雷霆

去走眼前閃閃雲霞澄由頂及脊漸穿腹複室匝匝迷

因仍此閒頻荷

六龍幸荆扉板屋無華增竹粉滴衣

秀色染松花拂帽寒香凝姬家鼎古費攷据華陽銘劍

難求徵浮萍兩點泊江介過客浮玉爭攀登茲山有如

隱君子自喜風骨藏峻嶒勝遊獲償夙昔願濁醪斗石

光猶能江天圖畫落吾手聯襪況有知心朋

謂夢樓

余至金山遣舟邀夢樓登陟旣罷而夢樓至遂

相與放舟至焦山其家僮已載酒肴相候乃飲  
於自然菴下山後約以明晨入甘露寺懼淹使  
程固辭而別用坡公金山韻賦贈

往年結交長安城壯遊慣聽談瀛海

夢樓會至琉球

去年作別

秀州樓管弦風月今何在

去冬余將北上遇夢樓於秀州置酒烟雨樓笙歌一部爲

樂竟

日金山花雨散曼陀我來探勝輕風波戴公怡住黃

鵝下隔江騁望離懷多翩然遂命飛鳧楫意外逢迎得  
此日非君誰肯踏浪尋炎天正翫陽烏赤芥子從來黏  
虎魄慧業不須談白黑君家門外雙椒明揚帆怕觸蛟  
龍驚饗風虐浪君所識攜我波濤弄造物今朝喜不負  
焦山美酒一勞腰腳頑莫便挽畱苦不已此情長似此

江水

京口驛聞門人茅畊亭

元銘

典浙江試事二首

衣鉢深慙物望輕  
門生重疊見門生  
歸途要聽鄉人說  
眞有金鑰刮眼明

吾來君里君辭

闕

畊亭京口人

君到吾鄉吾向闕  
卻憶三

年前舊事傷心  
天上玉樓人

甲午典吾鄉試事者爲侯官林于宣渴蓄亦余辛卯

所錄士人品高潔不幸短命死矣

過毘陵不得見歐北先生奉懷十二韻

睽隔十年久離愁  
安可論今朝持使節  
假道過恩門立  
雪情彌切占星意  
枉敦遙知絳紗帳  
祇在白雲村  
薄采陔蘭潔多栽玉樹繁  
階應畱故鶴庭或少懸  
狙出處

九重問詩篇四海尊可曾添白髮未欲戀朱轡我亦神  
僊侶難忘河海源行遊敬草木入里式車軒此去叨衡  
鑑斯文識本原歐公門下士今有幾人存

惠山下作次章懷座主秦靜軒先生

頻年來往九龍邊未試人間第二泉不及山僧雲臥好  
自拈松卵竹爐煎

見說秦家寄暢園借山借水作籬樊先生自有天隨興

不管子公駟馬門

先生爲司寇文恭公  
子歸棧已十餘年矣

無錫懷大司空嵇黼庭先生

尙書門館馬曹閑地望中朝早絕班相業定尊賢晏上  
交情敢說紀羣閒吹噓往往叨餘論謙謹人人近霽顏

無恙西神泉石在蒼生濟了待公還

鴛鴦湖

鴛鴦湖水故依然塵土棲皇十七年畢竟江南風景好  
鴈頭波浸卵黃天

立秋日石門道中書懷

重山複水使程賒耳習吳音已近家舒卷本隨雲出處  
往還卻作燕生涯泥香夜雨初肥稻涼意秋勝正熟瓜  
物候驚心緣底事高堂餐飯可能加

上天竺寺進香爲母祈福明水長老盛設齋饌  
用東坡臘日遊孤山訪惠勤惠思二僧韻

天有漢地有湖行人遊興安能無毛家埠口繫桂楫簷

輿嶺腹無騶呼此行不爲妻與孥亦非山水尋清娛普  
門法界祝慈般寶雲繚繞香烟紆禮罷遂叩元淨廬道  
人清癯如鶴孤不嫌淨域擾車騎殷勤牽挽餐伊蒲白  
飯下逮輿臺夫辰廚一飽堪忘哺清機輒語除毒熱乃  
歎出世真良圖仙佛可學道之餘我生何處廬非遽歸  
時不用追詩逋夢泉已有休文摹

中丞三公於殿旁新  
開夢泉同年沈雲叔

少宗伯爲  
作長歌

自天竺至冷泉亭小憩遂赴小有天園會東長  
前輩飲放舟北山而中立心舟二上人已櫂舟  
相迎乃至聖因方丈茶話仍用前韻

鳥戀木魚戀湖故鄉山水他鄉無半年橐筆侍金闕



雙峰白雲誰爲呼。竭來奉使拋其孥。一日之澤聊自娛。  
三天竺寺慈雲敷。飛來靈隱相縈紆。游遍遂造南屏廬。  
真其有鄰興不孤。碧筒象鼻吸荷露。紅觴鵲頭衝澤蒲。  
忽然飛錫尋征夫。謂言塔照將愁晡。竹爐苦茶解渴蛭。  
人漆斛定水翻海圖。一坐禪榻清風餘。不知蜨栩栩還周。  
遽煩師更致君復逋。孤山風月吾能摹。

武陵驛舍舟徑鳳皇山至錢塘江口偶成三首  
借得自南風。五兩行過直北路。三千不應便說風波了。  
到岸還須更上船。

誰記鷺湖舊典刑。松濤終古撼山青。梵天寺畔藤蘿月。

曾照芒鞋百遍經。

齊息園先生主敷文書院時余曾受業兩載

一江新水碧潏潏夾岸山容儼翠鬟風雨舊裝應識我  
而今恣看浙東山

兩年來主講蕺山  
來往江干最熟

### 初發漁浦

挂席赤亭道乘風泝大江涼多停扇羽山好拓船牕轉  
眼塔尖失迎頭潮意降沙邊翹白鷺曬翅一雙雙

### 桐廬雨泊

雲壑沈沈作去聲嫩涼飄然一舸載輕裝秋風秋雨桐江  
路不待援啼已斷腸

### 七里瀨

雙壁攢畫屏團團九折磨中有哀湍鳴深沈淥難唾人  
家濃翠裏茅屋三兩箇采薪或捕魚物外無租課輕舸

上急流邪許聲相和一犬吠青蘿似怪官船過

瀧中懷古

片石雙臺蹟尙存興亡殊軌道俱尊赤龍不屈狂奴節  
朱鳥空招汐社魂夜月垂綸謝天子秋風晞髮哭中原  
逸民義士長同傳欲把芳卮問九閭

釣臺

垂釣磐陀坐何心薄漢庭披裘人不見山色自長青我  
欲乘秋水呼天問客星扁舟挂帆去開落野花馨

題嚴子陵祠堂二首

太公用世嚴陵逸同遇興王釣不同似被當初巢許誤  
三千六百讓非熊

佐命同歸赤伏符江干一箇客星孤算來耿鄧勲難掩  
只合披裘作釣徒

建德夜泊二首

維舟古建德江色如練帶月出攬羣清潮平收眾嶺幾  
點漁火生疎星耿天外  
停杯對青山舉杯邀明月姮娥弄潺湲碎影相出沒夜  
半津鼓鳴已有鄰船發

送人歸楚

雨檝烟篷邂逅間新安江上送君還到時正白二湘露  
夢裏長青兩浙山塞馬功名誰得失磨牛蹤跡費追攀  
吾曹奔走催元鬢輸與沙鷗日日閑

江行雜咏八絕

黑鋒龍虎已難當  
胥種潮頭且遯強  
一掇江山明似繡  
康王爭得及錢王

怒濤袞袞鼉門來  
直到新安江始迴  
我有鄉心無處寄  
隨波流過越王臺

陵風破浪儼飛廬  
船尾鳴鉦腹插旗  
怪得坐來迷向背  
卻如潘閭倒騎驢

柯廬縣前津鼓鳴  
嚴陵灘畔釣竿橫  
不知佛髻幾千墨  
時有畫眉三兩聲

貪看山色富春東  
緩緩舟移夕照中  
只爲低頭臨禊帖

嗟夫過無數畫屏風

壘石迴湍似曲防轉輪激杵互低昂世閒原有天生福  
坐享成功孰主張

堆盤鞭筍當常蔬更聽眾船響釣車正是晚炊香稻熟  
綠蓑人喚賣鱸魚

十里峯腰九里松綠臯烏相黑茸茸預籌一事心先喜  
紅葉歸途定萬重

汝步曉發

風飽水波活日高山暝齊因之挂帆席那復認鉤梯密  
樹跑松鼠層崖叫竹雞忽看岡嶺斷前路是香溪

蘭溪卽事

蘭溪天下好山水萬里客舟薄暮經窈窕市樓倚江岸

參差戍火穿林垌，新月相輝兩玉珎。  
美酒試倒雙銀瓶，所思道遠不可致。  
空向芳潭舉素馨。

龍游晚眺

秋懷直與碧天空，日日江頭望不窮。  
新水送舟青活潑，斜陽穿樹赤玲瓏。  
差嫌魄礪灘羅石，常喜颺颺岸擘風。  
清景媚人無旦暮，一齊收拾與詩筒。

匝月以來思慮澹泊，無所入懷。七月十三日夜，忽夢與夢樓遊甘露寺，覺後枕上成一律寄之。  
瓜步潮留浮玉會，蘭陵酒憶鬱金香。  
秋風故國人方去，甘露清遊債未償。  
不用禪機分夢覺，須知世事有閑忙。  
醒來月鑒羅幃薄，獨聽波聲急撼牀。

上灘謠

一灘兮一灘湫鳴玉兮迴湍來船兮放溜去船兮水搏  
而石鬪緯夫連伍兮身彎環百丈繩繩兮牽且扳十步  
兮九曲石齒齒兮傷我足竹竿兮丁丁如鐵杖兮聲彭  
鏗孤篷欲上而不得上兮碾渦盤辟詰屈而迴縈汎汎  
兮潛潛退風之鷁兮沿壁之蝸汨汨兮御御入坎出坎  
兮遑恤女力山青青兮啼鷓鴣黃花白花兮交紛敷一  
灘兮旣上鼓我楫兮鳴我槳一灘兮復來雷砰砰兮耳  
轟隆隆吁嘻行路難兮柰此灘兮

雞鳴山 在西安北二十里

巨石如獅象無端赤岸蹲青泥焦欲盡白塔聳難捫灘



曲水聲咽雨來江氣昏篙工頻指點到此亦驚魂

衢州上航驛卽陸

此生飛鳥過青天奉使迢迢路五千一自抽帆登岸後  
風波不管去來船

雨中自江山縣至小關驛

水盡重登陸巖疆細路穿地猶姑蔑舊雨訝漏天連雨  
翼橋標立千礮稻浸懸自衢至閩有橋必閣以避風雨  
土人犁山爲田就山之坡陀處  
爲層累卽昔人  
所謂礮田者是攀蘿從此始終日在雲煙

嘲江郎山

入山看山山盡佳丹黃五色燒神媧陽開霽旭陰藏霾  
蒼簍滴粉松懸釵下從麓趾上巔崖陟降要足融心懷

江郎之名誦述皆未到雙眼先摩指三峯矗立高巖裏  
芙蓉鏤出金鞵鞞五丁下相帝簡差鉤梯斷絕不可階  
其下徑路盤巖蝸迤邐四望窮根荻初觀猶如玉筍排  
峯迴審諦神忽乖其一踞坐當道豺旁有洞戶斜開闔  
扶畱薜荔垂綬綢千年古塔畱厓厓不然廢堞當荒街  
其一肩背相摩挨夜施鬼斧如劈柴至今倒植雙麻屨  
織簾編箔枯秫稽約板版堵無廉堦根羅小石甃與蛙  
重岡複嶺空離孤土人指點堪噤嚙云是兄弟三人偕  
登山化石同姣娃參差仙蛻僵遺骸荒唐之說非模楷  
名山眼見寧有涯大鑪何獨鎔頑錯白雲蒼霧憑沈蕤  
不用衡岳昌黎齋水田活活禽喈喈我詩險語聊詼諧

秋夜山館聽雨

似密還疎點滴頻  
芭蕉幾樹與牕鄰  
清秋一夜瀟瀟雨  
卻是三千里外人

自小關驛徑仙霞諸嶺至浦城縣

漸江路旣窮  
甌越境初拓  
不知此戶穴  
何年費開鑿  
天風吹我衣  
飄然入雲壑  
遂覺俛仰閒  
暘昧失寥廓  
四山圍鏡障  
屬繹壯關鑰  
複嶺互盤紆  
孤峯或戍削  
仙霞獨高標  
遙睇青漠漠  
千年老松樹  
上與層霄薄  
蟻磨造其巔  
松枝在山脚  
卻顧所從來  
浮萍幾點泊  
我昔登蠶叢  
意更無險惡  
及此乃庶幾  
稍稍動心魄  
仰聆絕頂湫  
齊向峯腰落  
百穗挂珠旒  
一奩張玳箔  
奔騰怒未息  
勢

與石相搏曲折走蛟龍琤琮鳴鼓樂居民事隨生耕墾  
傍崖磳縱縱鳥卵累累齧齧犬牙錯隨水貫注之蓄洩天  
然谷我來正食新安享得無忤兩山橫絕處往往架飛  
閣風雨忽然來亦足便棲託十里九息肩輿丁骹骯弱  
嗟彼執役徒潦霧濺芒屨陟降未告疲觀聽乍增愕邐  
迴三日行俯見浦城郭入境問俗宜正可周咨度惜哉  
鳩舌音象譯解難索

浦城

北險仙霞接南疆柘浦分四圍山似赭千頃稻如雲藻  
采江淹筆蟲沙史浩軍空餘懷古意吟嘯倚斜曛

建陽行館臨水面山階前蘭蕙叢發極有幽致

余病不能起感賦一律

寒暑無端病劇攻  
倦程且與息勞躬  
青山作意偏排闥  
芳草多情自轉風  
日課定嫌詩債負  
天文未卜使星窮  
遠遊人仗誰憐惜  
不服陳方策取中

建延雜詩十首

山景渾無複時從絕處通  
千盤巖腳路百戰嶺頭風  
猿鳥呼新侶松篁礙舊叢  
人家宜聽雨多在綠天中  
楓嶺前岡接梨關細路分  
仄行時避石直上爲穿雲  
但坐竹兜穩休扶藤杖勤  
輿丁都肉薄作勢策勞筋  
當年劉正彥此地遇韓王  
酌酒披忠膽扶天返御牀  
軍聲警江表古蹟認漁梁  
太息英雄事憑誰弔戰場

觀水文瀾壯升堂禮器新欲尋微國蹟多在建溪濱  
僞學時方禁儒林氣益振淵源師友籍名姓未全湮

未卜厓山覆終隨信國蹤運方遭百六卦且賣單重卻  
聘書何婉求材詔肯從流傳蒼石硯鸛眼淚痕濃

茶經詳北苑劍氣識南平神物終須去龍團且與烹人  
悲張壯武我笑蔡端明作事須籌審那孤佳士名

自入南鄉

橋名

界彎環徧繞溪流奔疾似箭石亂密於篴

細響風絃操雄聲陣馬蹄輕舸能一葉邪許百夫齊

曲曲懸鳴瀑層層湊密畚糞田燒薶後安碓壅湍初稻  
壑時藏鳴榕溪不種魚但看磽瘠土民力恐難舒

估客爬山慣居民趁浦皆腦危樓織笠頭屈竹編簞橘

柚迎秋實茶桐計畝排淡芭菇更好布網曬荆柴竹虎  
書所云與轡也俗名爬山虎土人編竹爲簾以浮溪湖  
形似小鰈茶樹木理如紫薇葉類桂而小子圓銳似凍  
與桐子俱可造油

千里無平地三秋有伏天  
嚼膚憎白鳥聒耳訝元蟬  
已飽蘭花馥空貪荔子鮮  
但將閑草木隨意入詩篇

水口

劍江千百盤坎窞只容鰈  
亂石散牛羊驚波颭鱗鬣  
今朝到水口岸闊風淪貼  
宿鷺戲槩牙白雲上帆葉  
且息腰腳疲欣然占利涉  
遙望無諸城一片孤烟接

悅親樓詩集卷八終

門人朱霞校字